



# UCHAGUZI WA SERIKALI ZA MITAA TANZANIA BARA, NOVEMBA 2004

**TAMKO LA  
CHAMA CHA MAPINDUZI  
KWA MUHTASARI**

## UCHAGUZI WA SERIKALI ZA MITAA TANZANIA BARA, NOVEMBA 2004

### TAMKO LA CHAMA CHA MAPINDUZI

#### **JE, TAMKO HILI LINAHUSU NINI NA LINAMLENGA NANI?**

1. Katika uchaguzi uliopita wa Serikali za Mitaa ngazi ya Vitongoji, Vijiji na Mitaa uliofanyika Novemba, 1999, Chama Cha Mapinduzi kilipata ushindi mkubwa sana wa asilimia tisini na tano (95%).
2. Lengo la CCM katika uchaguzi wa Novemba, 2004 ni kupata ushindi mkubwa ili utufagilie njia kwenye Uchaguzi Mkuu wa Oktoba 2005.
3. **Kwa hiyo, Chama Cha Mapinduzi kinatoa Tamko ili kuwaomba wapiga kura katika Vitongoji, Vijiji na Mitaa kuwachagua wagombea wa CCM katika nafasi za uongozi katika uchaguzi ujao wa Serikali za Mitaa.**

#### **NI SABABU ZIPI ZINAZOHALALISHA CCM KUENDELEA KUPEWA UONGOZI?**

4. Serikali ya Awamu ya Tatu imefanikiwa kuanzisha mchakato wa kuitoa nchi yetu pale tulipokuwa mwaka 1995 na kutuingiza katika mkondo wa maendeleo endelevu. Ili tupige hatua zaidi tunahitaji kuendelea kuwa na Serikali Kuu imara na adilifu na Serikali za Mitaa adilifu na zenye utawala wa kidemokrasia, Chama chenye uwezo wa kuunda Serikali hizo ni CCM.
5. ***Kwa hiyo, Chama Cha Mapinduzi ndicho Chama kinachostahili kuendelea kupewa dhamana ya kuongoza Serikali za Mitaa za Vitongoji, Vijiji na Mitaa kwa sababu ndicho Chama pekee;***
  - ***Chenye mtandao na uhai kwenye Vitongoji, Vijiji na Mitaa na hivyo, kinayaelewa na kuyajua matatizo ya wananchi yalivyo huko.***
  - ***Chenye uzoefu wa kuongoza na kuendesha Serikali za Mitaa na uzoefu ambao umetoa matunda yanayoonekana.***
  - ***Chenye Sera sahihi juu ya Serikali za Mitaa ya kupeleka madaraka kwa wananchi Vitongojini, Vijijini na kwenye Mitaa na kujenga utawala wa demokrasia shirikishi.***
  - ***Sera ya CCM ya kujitegemea inawapa wananchi uhakika wa kuendelea kujitawala wenyewe na kujitegemea.***

#### **SERA YA MSINGI YA CCM KUHUSU SERIKALI ZA MITAA**

7. CCM inatambua kuwa Serikali za Mitaa ni sehemu ya msingi ya madaraka ya umma kwa vile ni Taasisi zinazowezesha wananchi kujitawala wenyewe kidemokrasia. Serikali za Mitaa ni chombo chao ambacho kinahitaji dhamira yao ya hali na mali, kwa hiyo wasingojee Serikali zao kuwaendeleza wao bali wazitumie Serikali hizo kujiendeleza wenyewe.
8. Aidha inasisitiza juu ya suala la Uwajibikaji wa Serikali za Mitaa kwa wananchi,

na umuhimu wa Serikali Kuu kuziwezesha Serikali hizo kuwa kichocheo cha maendeleo na kupambana na umaskini.

### **REKODI NZURI YA MAFANIKIO YA KIUCHUMI, KIJAMII NA KISIASA KATIKA KIPINDI CHA AWAMU YA TATU YA UONGOZI WA CCM**

9. Serikali ya Awamu ya Tatu ilipoingia madarakani Oktoba, 1995 iliyatambua matatizo yaliyokuwa yanaikabili nchi yetu ambayo ni pamoja na uwezo mdogo wa Serikali katika kutoa huduma. Kwa hiyo kazi kubwa iliyoikabili Serikali katika kipindi hiki ni kubuni mikakati mbalimbali ya kusukuma na kuchochea maendeleo ya kiuchumi, kijamii na kisiasa. Mikakati hiyo imeleta mafanikio katika nyanja zifuatazo:

#### **Uchumi**

- (a) Ukuaji wa Pato la Taifa umeongezeka kutoka asilimia 3.6 mwaka 1995, hadi kufikia kilele cha asilimia 6.2 mwaka 2002.
- (b) Mfumuko wa bei umeshuka kutoka asilimia 27.1 mwaka 1995, hadi asilimia 4.4 mwaka 2003.
- (c) Uzalishaji viwandani na katika mashirika sasa ni wa ufanisi mkubwa kufuatia mafanikio ya utekelezaji wa sera ya ubinafsishaji. Hivyo kuipatia Serikali mapato makubwa kupitia kodi nakadhalika.
- (d) Ruzuku ya Serikali Kuu kwa Serikali za Mitaa imeongezeka mara 24 kutoka Shilingi 12.3 bilioni mwaka 1995/96 hadi shilingi 292.0 bilioni mwaka na 2003/2004.
- (e) Makusanyo ya mapato ya Serikali yameongezeka kutoka wastani wa Shilingi 25 bilioni kwa mwezi mwaka 1995 hadi kufikia wastani wa Shilingi 120 bilioni kwa mwezi, mwaka 2004.
- (f) Kuanzia mwaka 2000 Tanzania imekuwa ikitekeleza **Mkakati wa Kupunguza Umaskini** kwa maana fedha ambazo zingetumika kulipia madeni ya nje (ambayo yamefutwa) sasa zinaelekezwa katika Sekta teule za elimu, afya, maji, barabara za vijijini, kilimo, na utawala bora.
- (g) Mapato yatokanayo na utalii yameongezeka kutoka Dola za Kimarekani 259 milioni mwaka 1995 hadi Dola 731 milioni mwaka 2003.
- (h) Upanuzi katika Sekta ya madini umeongeza ajira kwa wananchi katika maeneo mengi. Katika maeneo mengi wenye migodi hiyo wamechangia katika kuboresha huduma za jamii na miundo mbinu.

## **Maendeleo ya Jamii**

10. Mpango wa TASAF kwa kushirikiana na wananchi umeleta mafanikio makubwa katika maeneo ya elimu, afya, barabara za vijijini, maji na kadhalika.

## **Huduma za Jamii**

### ***Elimu***

Sekta ya Elimu ya Msingi imepiga hatua kubwa kama ifuatavyo:-

- (i) Kufutwa kwa ada za Shule za Msingi mwaka 2002/2003 kumwezesha kuongezeka kwa idadi ya wanafunzi wa shule za msingi kutoka 3,877,643 mwaka 1995 hadi 7,083,063 mwaka 2004.
- (ii) Mpango wa Maendeleo ya Elimu ya Msingi (MEM) ulioanza kutekelezwa mwaka wa 2002 umekwishaleta mabadiliko makubwa ya sura za shule za msingi nchi nzima.
- (ii) Serikali imeajiri walimu 37,261 kati ya mwaka 2000 na 2004.
- (iv) Serikali imepunguza ada ya Shule za Sekondari za Serikali za kutwa kwa asilimia 50 wakati hatua nyingine za kukarabati na kujenga majengo ya Sekondari nchi nzima zinaendelea.

### ***Afya***

- (i) Chanjo za watoto chini ya umri wa miaka mitano zimefikia asilimia 90.
- (ii) Serikali imeanzisha Sera ya bima ya afya kwa wafanyakazi wa sekta ya umma.
- (iii) Ukarabati mkubwa wa hospitali kuanzia Hospitali ya Taifa Muhimbili mpaka hospitali za Wilaya uko katika hatua mbalimbali za utekelezaji.
- (iv) Serikali imefuta kodi ya vyandarua na bidhaa nyingine zinazosaidia vita dhidi ya malaria.
- (v) Programu kabambe ya kukabiliana na janga la UKIMWI imeanzishwa na inatekelezwa.

### ***Maji Mijini na Vijijini***

- (i) Hadi kufikia Desemba 2003 Kamati za Maji 8,368 zimeanzishwa na kati ya hizo 7,226 zilikuwa na mifuko ya maji yenye thamani ya Sh. 13 bilioni.
- (ii) Idadi ya wakazi mijini wanaopata huduma ya maji safi na salama imeongezeka kutoka asilimia 68 mwaka 1998 hadi asilimia 73 mwaka 2003.

- (iii) Idadi ya wananchi vijijini wanaopata maji safi na salama imeongezeka kutoka asilimia 48 mwaka 1995 hadi asilimia 53 mwaka 2003.
- (iii) Pamoja na miradi midogo midogo inayoendelea, Serikali inashughulikia miradi mikubwa ambayo ni pamoja na mradi wa maji toka Ziwa Victoria kwenda Wilaya za Shinyanga Mjini na Kahama, mradi wa maji wa Chalinze katika Mkoa wa Pwani, mradi kabambe wa Jiji la Dar es Salaam na kadhalika.

### **Huduma za Kiuchumi**

#### ***Barabara***

- (i) Toka mwaka 2001, Serikali imekuwa ikitenga Sh.1.8 bilioni kila mwezi kwa ajili ya ujenzi wa barabara nchini. Fedha hizo kwa pamoja na zile za *road toll* na za wahisani, zimewezesha kuboresha kwa kiwango kikubwa mtandao wa barabara kuu na za vijijini nchi nzima.

#### ***Mawasiliano***

- (ii) Tanzania katika kipindi hiki imeshuhudia ongezeko kubwa la mtandao wa mawasiliano, hasa simu za mikononi.

#### ***Umeme***

- (iii) Katika Ilani ya Uchaguzi Mkuu Oktoba 2000, Chama Cha Mapinduzi kilitoa ahadi ya kuendelea kushughulikia suala la usambazaji wa umeme katika miji mikuu ya Wilaya iliyobaki ambayo idadi yake ilikuwa 18. Hadi Julai, 2004 miji mikuu ya Wilaya nane imepatiwa umeme. Hadi kufikia mwaka 2005 miji mikuu mingine ya Wilaya sita itakuwa imepatiwa umeme. Hatua za awali zimeanza kuchukuliwa ili kuanza utekelezaji wa mradi wa kufikisha umeme katika miji mikuu ya wilaya mine iliyobaki.

### **Mafanikio ya Kisiaa**

#### ***Utengamano wa Kisiasa***

11. Mazingira yaliyosababisha mafanikio haya makubwa ya kiuchumi na kijamii ni kuwepo kwa amani na utulivu wa kisiasa nchini. Serikali ya CCM ya Awamu ya Tatu imeweza kuendelea kujenga na kudumisha hali ya amani na utulivu kwa kipindi chote cha uongozi wake tangu ilipoingia madarakani mwaka 1995.
12. Rushwa imendelea kupungua baada ya mianya mingi ya rushwa kuzibwa. Katika tathmini za Kimataifa, Tanzania sasa imeondoshwa katika kundi la nchi zinazoongoza kwa rushwa duniani na Afrika.

#### ***Kupanuka na kuimarika kwa Demokrasia na Utawala Bora***

13. Katika kipindi hiki demokrasia imepanuka na kuimarika katika nyanja za uhuru wa kuabudu, kutoa maoni, kuanzisha asasi zisizo za kiserikali na uhuru katika nyanja mbalimbali zinazowagusa wananchi vikiwemo vyombo vya habari,

vyama vya siasa na kuanzishwa kwa Tume ya Haki za Binadamu na Utawala Bora nakadhalika. Kupanuka na kuimarika huku kwa demokrasia kumechangia kwa kiwango kikubwa kuimarisha amani na utulivu.

## **JE, CCM INA MKAKATI GANI WA KUPAMBANA NA UMASKINI NA UWEZESHAJI WA WANANCHI?**

### **Kupambana na Umaskini**

14. Sera za Chama Cha Mapinduzi za kupambana na umaskini zimeweka bayana mikakati inayoelekeza nini kifanyike katika kufanikisha mapinduzi katika kilimo, ufugaji na uvuvi. Licha ya juhudi zilizofanyika hadi sasa, kilimo, ufugaji na uvuvi wetu bado havijawa vya kisasa kwa sababu havitumii sayansi na teknolojia. Hivyo mikakati ifuatayo itatekelezwa katika kuleta mabadiliko hayo:

#### **Kilimo**

Msisitizo mkubwa utaendelea kuwa wa kumwezesha mkulima kuingia katika kilimo cha kisasa.

#### **Ufugaji:**

Mkazo utawekwa katika kulenga na kuhakikisha kuwa Tanzania inatumia vyema rasilimali kubwa iliyonayo ya mifugo kwa namna inayozingatia zaidi ubora badala ya uwingi tu.

#### **Uvuvi**

CCM itaweka pia mkazo katika kuzitumia maliasili zilizomo katika bahari maziwa na mito ili kuvuvi watumie fursa zake kuinua hali zao za kiuchumi kwa kuhakikisha kuwa wanatumia maarifa ya kisasa

#### **Ushirika**

Ushirika bado ndiyo chombo cha kuleta maendeleo na ukuzaji wa nguvu za kiuchumi. Ili kuviwezesha vyama vya ushirika kufanya shughuli zake kwa ufanisi na tija, CCM itahimiza kuimarishwa kwa mafunzo ya elimu ya ushirika na kufikishwa kwa elimu na ujuzi huo kwa wananchi hasa katika fani za menejimenti, uchumi na uhasibu. Mkazo mkubwa utaendelea kuwekwa katika uanzishaji na uendelezaji wa Vyama vya ushirika wa kuweka na Kukopa (SACCOS).

### **Uwezeshaji wa Wananchi**

15. Serikali ya CCM imekuwa na mikakati ya kuwawezesha wananchi kiuchumi kwa kuwa na mifuko mbalimbali kwa madhumuni hayo.

***"Dhana kuu hapa ni uwezeshaji, yaani kuunda mazingira muafaka yatakayowapatia (wananchi) fursa za kumiliki ardhi, viwanda na zana za kazi, kupata mitaji ya kuwekeza katika shughuli za kiuchumi, na kupata elimu na maarifa ya kuendesha biashara na miradi ya kiuchumi". Rais Benjamin William Mkapa.***

## Changamoto kwa Wananchi

16. CCM inatambua kuwa changamoto ya kupambana na umaskini haiwezi kuwa na mafanikio bila ya wananchi wenyewe kukubali na kuchukua jukumu la **kujitegemea katika kujiendeleza**. Hivyo wananchi wana wajibu wa kuchangia nguvu zao kwa kuziunganisha na za Serikali na wadau wengine ili kujiletea maendeleo yao binafsi na ya jamii.

### CCM: CHAMA CHENYE UWEZO NA UZOEFU WA KUIONGOZA TANZANIA KATIKA KARNE HII

17. Kama ilivyokuwa katika mwaka wa 1995, wakati nchi yetu iliporejea tena katika mfumo wa uchaguzi unaoshirikisha ushindani wa vyama vingi vya siasa, Chama Cha Mapinduzi kilitamka bayana kwamba: **CCM hakikuwa Chama kipya bali Chama chenye historia. Kwamba, kikiwa kimetokana na TANU na ASP, CCM imetawala katika kipindi chote tangu uhuru hadi sasa. Na Mafanikio yake, katika kipindi chote hiki yamekuwa ya kupigiwa mfano katika Bara la Afrika. Katika kuhimili majukumu yake ya kihistoria, ya kujenga Umoja wa Taifa hususan mazingira ya amani na utulivu nchini, na hatimaye kubeba jukumu la kuwa ni Chama cha Ukombozi, hadi sasa hakuna vyama vya siasa vya kukilinganisha nacho.**
18. Historia hii ya Chama Cha Mapinduzi iliyodhihirishwa na kuwapo ndani ya Chama kwa taratibu nzuri za kuwapata Viongozi wake, taratibu nzuri za kuwapata Wagombea katika nafasi mbalimbali za uongozi katika mfumo wa Dola, yaani kuanzia Kitongoji, Mitaa, Vijiji, Kata, Majimbo, Wilaya, Mkoa hadi Taifa, imekuwa ikijengwa hatua kwa hatua na kuimarika. Aidha, Chama Cha Mapinduzi kinao utaratibu wa kujikosoa na kukosoana. Kutokana na kuwapo taratibu kama hizi, Dira ya Chama Cha Mapinduzi imekuwa daima ni kujenga maadili ya kuwapata **Viongozi-Watumishi**.
19. Chama Cha Mapinduzi hakikufikia historia hii kutokana na bahati au kwa kuotea. Tangu kuasisiwa kwake, vyama vianzilishi vya ukombozi TANU na ASP, na sasa CCM, vimekuwa na kazi ya kubuni, kujenga, na kuelezea kwa makini Sera zake zinazolenga mustakabali wa Taifa letu.
20. Katika kipindi hiki cha Uchaguzi wa Serikali za Mitaa, ngazi za Vitongoji, Mitaa na Vijiji, CCM inasisitiza kwamba kazi ya kujenga umoja wa kitaifa inafanyika kwa misingi ya Sera. Kwa maana hiyo, Sera za CCM, zimekuwa ni chachu ya umoja, upendo, mshikamano na kuaminiana miongoni mwa wananchi wa Tanzania. **Hakika hakuna Chama kingine makini kama Chama Cha Mapinduzi.**
21. Katika kipindi hiki tulichonacho, Watanzania tunahitaji kupata uongozi madhubuti wenye kuweza kupambanua changamoto za kukabiliana na umaskini, unyonge, uchafuzi wa mazingira, magonjwa sugu, njaa nakadhalika. **Chama pekee chenye Dira na Jukumu la kutuwezesha kukabili hali hii; chenye sera sahihi juu ya matumizi endelevu ya rasimali; chenye mipango na mikakati ya kukuza uchumi kwa kuwajengea wananchi uwezo wa kutumia fursa zilizopo, ni CCM.**



# KIDUMU CHAMA CHA MAPINDUZI

*Kimetolewa na Makao Makuu ya CCM, Dodoma*